

Ucaptama Tahunan Naib Canselor

"Berminda Strategis, Bertindak Progresif", Memantapkan Pentadbiran UniMAP.

"Berminda Strategis, Bertindak Progresif". Itu adalah harapan Naib Canselor Universiti Malaysia Perlis (UniMAP), Kol. Prof. Dato' Dr. Kamarudin Hussin semasa Majlis Ucaptama Tahunan Naib Canselor UniMAP 2008 yang diadakan di Dewan Capitol pada 19 Februari 2008.

Beliau berpendapat bahawa majlis tahunan itu merupakan medan tinjauan, penyampaian cita-cita dan harapan supaya setiap warga UniMAP berkongsi demi pembangunan universiti dan pelajar. Ucapan lebih sejam itu membentangkan tentang strategi dan komitmen untuk memajukan universiti ke peringkat yang lebih tinggi.

"Strategi ialah pelan tindakan untuk mencapai matlamat yang dikenali sebagai kejayaan. Jika mahu berjaya, satu perancangan yang komprehensif dan bersepadau harus menjadi tunjang dalam setiap pelaksanaan agar kejayaan mampu diraih".

Beliau turut melahirkan kerisauan sekiranya pemahaman konsep strategi berbeza di kalangan warga UniMAP kerana impak kepada pola tindakan; arah inisiatif; dan hala tuju yang bakal diterokai adalah tidak sekata.



"Jika tidak sama, tidak sekata, akhirnya ke mana hendak kita bawa universiti ini? Justeru, saya berpendapat bahawa ada baiknya kita menyelesaikan masalah asas ini terlebih dahulu sebelum membicarakan aspek-aspek yang berkaitan dengannya secara lebih terperinci", ulasnya.

Beliau turut mengaitkan komitmen warga UniMAP sebagai satu keterikatan (adherence) kepada sesuatu secara intelektual dan emosional.

"Jika kita telah komited tentang atau pada 'sesuatu', maka fikiran dan emosi kita perlulah berpegang teguh dan patuh pada 'sesuatu' itu, barulah kita mampu mencapai setiap yang kita inginkan", tambahnya.

Menurutnya lagi, "Kepatuhan dan kesetiaan kita yang tidak berbelah-bagi itu tidak boleh bersifat sementara, sekejap yakin; sekejap sangsi; hari ini dipersetujui; esok diragui. Sebaliknya, kita mestilah meyakini kesepakatan dan persetujuan itu secara berterusan walau apa pun cabaran yang mungkin mencabar dan mencengkam kita dalam usaha memperjuangkannya".

Selain itu, beliau turut meminta supaya warga UniMAP menghargai masa dan melaksanakan tanggungjawab sebagai satu amanah untuk kecemerlangan universiti.

Beliau juga berharap agar semua warga UniMAP dapat memahami Dokumen Pelan Strategik UniMAP 2008-2010 yang turut dilancarkan pada hari tersebut kerana sebagai usaha awal UniMAP untuk bertindak secara strategik dan seterusnya membudayakan konsep strategik.

"Kita semua perlu memahami kandungannya. Jika tidak dibaca, bagaimana kita mahu melaksana aktiviti-aktiviti strategik yang dirancangkan. Ingatlah bahawa banyak syarikat gagal kerana 95 peratus tenaga kerjanya tidak memahami strategi organisasi mereka".

"Dan 70 peratus syarikat gagal bukan kerana strategi yang tidak baik, tetapi kerana pelaksanaannya yang teruk. Oleh sebab itu saya menuntut komitmen semua pihak untuk merealisasikan perancangan yang telah kita bentangkan", ulas beliau semasa pelancaran Buku Pelan Strategik dan Program 'i' yang turut dimuatkan sebagai salah satu program wajib pelajar dalam 7 pillars.

UniMAP telah menetapkan tujuh teras strategik yang perlu diberi tumpuan bagi semua aktiviti universiti iaitu Memantapkan Hala Tuju Akademik, Memartabatkan Kurikulum Berorientasikan Praktikal, Menggemilangkan Penyelidikan dan

Inovasi, Mempergiat Program Pengantarabangsaan.

Turut dimuatkan dalam buku itu juga ialah Melestarikan Pembangunan Modal Insan dan Mempermurni Konsep Kampus Teragih, Menyumbang kepada Perkembangan Agroindustri Watan, Mempermantap Tadbir Urus, Sistem Penyampaian dan Menjana Sumber Kewangan.



"Pada masa akan datang, sinergi idea dan tenaga para pensyarah dan mahasiswa dalam aspek ini diharapkan dapat menghasilkan teknologi yang berasaskan kejuruteraan dan teknologi-teknologi lain yang dapat dimanfaatkan oleh penduduk setempat dalam usaha mereka menyelesaikan pelbagai masalah yang berkaitan dengan pertanian, perusahaan atau perniagaan supaya mereka dapat menambahkan produktiviti".

Tambahnya lagi, "Pemantauan yang berterusan akan dilaksana untuk memastikan pentadbiran akademik lebih serius dan konsisten oleh semua pensyarah sehingga dapat melahirkan mahasiswa yang seimbang daripada segi pencapaian akademik dalam konteks keseimbangan penguasaan aspek teori dengan penguasaan aspek praktikal atau kerja kursus. Dari semester ke semester peratusan mahasiswa yang lulus kedua-dua komponen penilaian (teori dan kerja kursus) akan dipertingkatkan".

Majlis yang dihadiri lebih 1000 kakitangan dan pemimpin pelajar telah dianjurkan sejak dari 2003 hingga sekarang.

Oleh : Nurul Aida Othman